

**Siunnersuut uunga: Ilinniarnertuunngorniartarneq pillugu Inatsisartut inatsisaat nr. xx,  
xx.xx 2011-meersoq**

*(Ilinniartitaanermut, Ilisimatusarnermut, Nunanullu Avannarlernut Suleqateqarnermut  
Naalakkersuisumit saqqummiunneqartoq)*

**pillugu**

**Kultureqarnermut, Ilinniartitaanermut, Ilisimatusarnermut, Ilageeqarnermullu  
Ataatsimiititaliap**

**ISUMALIUTISSIISUTAA**

**Siunnersuutip aappassanneernerani saqqummiunneqartoq**

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap kingullermik suliarinninnermini ukuninnga inuttaqarpoq:

Inatsisartunut ilaasortaq Jane Petersen, (Inuit Ataqtigiit), Siulittaasoq

Inatsisartunut ilaasortaq Niels Thomsen, (Demokratit), Sinniisussaq

Inatsisartunut ilaasortaq Hans Aronsen, (Inuit Ataqtigiit)

Inatsisartunut ilaasortaq Ruth Heilmann, (Siumut)

Inatsisartunut ilaasortaq Aleqa Hammond, (Siumut)

UKA 2011-mi ulloq 22. september 2011-mi siullermeerlugu suliarineqarnerata kingorna siunnersuut ataatsimiititaliamit misissorneqarpoq.

**Siunnersuutip imarisaa siunertaalu**

Ilinniarnertuunngorniartarnermik aqqissuusseqqinnermi inatsisitigut tunngavissatut siunnersuut isigineqassaaq. Ilinniarnertuunngorniartarnermik aqqissuusseqqinnermi Naalakkersuisut pingaarnertut siunertaraat nunatsinni ilinniarnertuunngorniartarnerit ineriartortinneqarnissaat, taamaalilluni inuusuttut amerlanerusut ilinniarnertuunngorniartarnermik naammassinnittaqqullugit, tamatumalu peqatigisaanik ilinniakkanik ilisimasaqalerneq nukittorsarneqassalluni nunallu tamat akornanni ilinniarnermi pisinnaasat pigiinnarneqassallutik.

Ilinniarnertuunngorniartarnermik aaqqissusseqqinnerup Kalaallit Nunaanni ilinniarnertuunngorniartarfeqarneq tamatigoornerusoq pilersissavaa, tassani ataatsimut tunngaviusumik ilinniarneq aallaavigalugu ilinniakkat sammivii assigiinngitsut ilinniartut ataasiakkaat pisinnaasaannik soqutigisaannillu isiginninniarfiusut akornanni toqqaasinnaallutik. Ilinniarnertuunngorniartarnermik aaqqissusseqqinnermi ilinniartut assigiinngiaartut piomassuseqarnerat ilikkagaqartarnerlu annertunerusumik nukittorsarneqassapput. Inatsisissatut siunnersuutikkut siunnersuutigineqarpoq ilinniarnertuunngorniartarfeq atorneqalissasoq, ”ilinniarnertuunngorniartarfeq”, taamaalilluni Kalaallit Nunaanni ilinniarnertuunngorniartarfeq (GU), Kalaallit Nunaanni qaffasinnerusumik niuerneramik soraarummeertarfeq (Hhx) aammalu qaffasinnerusumik teknikkikkut soraarummeertarfeq (Htx) taarsissallugit. Ilinniarneq ukiunik 3-nik sivisussuseqarpoq arfinilinnillu semestereqarluni.

Ilinniarnertuunngorniartarnerup Kalaallit Nunaanni, Danmarkimi nunanilu allani ilinniarnermik aallartitsinissamut piareersarfiusussatut nalinginnaasumillu perorsaataasumik ilinniarnarfiusussatut siunertaa siunnersuummi ingerlateqqinneqarpoq.

Ilinniarnertuunngorniartarfeqqut piareersunut sanilliulluni Siunnersuut nutaaliornernik arlalinnik imaqarpoq:

1. Ilinniarnertuunngorniarnermik ataasiusumik ilinniartitsissutissanilli immikkut ilinniarfiusinnaasunik pilersitsineq
2. Ilinniartitaanerup siunertaanik itinerusumik allaatiginninneq
3. Ilinniartunngorsinnaanermut maleruagassat nalorninangitsut
4. Ilusilersuineq nutaaq ataatsimoorussamik ingerlatsinertalik aamma ilinniarniakkanut assigiinngitsunut ingerlaqqissinnaaneq
5. Ilinniartitsissutissat nutaat
6. Ukiumut aalajangersimasumik piffissaqartitaanermik eqqussineq
7. Piomassuseq tunngavigalugu ilinniartinneqarsinnaanermut neqerooruteqarneq
8. Ilinniartitaaneq allamiut oqaasiinik ingerlanneqartutut perorsaaneq pillugu tunngaveqartitaq
9. Suleriaatsit perorsaanerlu pillugit itisilerlugit tunngavigisanik nalunaarsuineq
10. Ilinniartitsisooqatigiinnik aallartitsineq
11. Ilinniarfiup siunnersuinerup pisussaaffiinik nukittorsaaneq

12. Immikkut aaqqissukkamik ingerlatsisinnaanerup nukittorsarneqarnera
13. Angajoqqaanut atassuteqarnissamik piumasaqaateqarneq aamma ingerlaavartumik nalilersuisarnermik erseqqissaaneq
14. Ilinniartitsisut rektorillu piginnaasassaannik piumasaqarneq aamma akisussaaffinnik erseqqissaaneq
15. Siunnersuisooqatigeeqarnermut maleruagassanik suliaqarneq (ilinniartitsisut aamma ilinniartut siunnersuisooqatigiivi)
16. Ilinniarnertuunngorniartinnit ataasiakkaani pitsaassutsimik inerisaanermik aamma angusanik nalilersuisarnermik qulakkeerinnineq.

Siunnersuummut tunngavigineqartup siunnersuummilu qitiutinneqartut annertunerusumik paasisaqarfiginissaannut siunnersuummut nassuiaatit aamma innersuussutigineqarput.

Inatsit 1. august 2012-imi atuutilissaaq, taamaattorli kapitali 2 ilinniarnissamut akueritittarnermut tunngasoq 1. januar 2012-imi atuutilissalluni.

### **Siunnersuutip Inatsisartunit siullermeerneqarnera**

Siullermeerlugu suliarineqarnerani inatsisartunit siunnersuut nalinginnaasumik iluarisimaarneqartoq ataatsimiititaliap maluginiarpaa, kisianni partit ataasiakkaat ilaatigut imatut oqaaseqaateqarlutik.

### **Inuit Ataqtigiit.**

Inuit Ataqtigiit kissaatigaat timersorneq ilinniarnernerup ukiuisa aappassaanni aalajangersimasumik pisartussatut atuartitsissutaasalissasoq. Ilanngullugulu Partip nutarterinermut atatillugu Kultur pillugu atuartitsissutitut atuutilerana nutaaliornertut annertuutut isigaa.

### **Siumut**

Siumumit pingaartinneqarpoq, Kalaallit oqaasiisa pingaartinneqarnissaat, aammalu ilinniarnertuunngorniartinnit ilinniarnernerup Kalaallit Nunaannut naleqqussarneqarnissaa. Ilanngullugulu Siumumit pingaartinneqarluni, ilinniartunik siunnersuisarnerup tapersersuisarnerullu annertusarneqarnissaa, taamaalilluni ilinniartut maanaannaq anisarnerat sapinngisamik pinngitsoorniarneqassammat.

**Demokraatit**

Demokratinit pingartinneqarpoq, Ilinniarnertuunngorniarfinnut aningaasaliissutit ikilisarneqannginnissaat, aammalu malittarisassat ingerlaavartumik suliarineqartarnissaat, ilinniarnermiit maanaannaq anisarneq pinngitsoortinniarlugu.

**Atassut**

Taamatuttaaq Atassummit pingartinneqarpoq ilinniartut ilinniarnerminnik ingerlatsiinnarnissaat aalajangiusimaneqassasoq, aammalu maanaannaq anisarnepup annertuup pakkersimaarneqarnissaa, ilaatigut ilinniartut ataasiakkaat atugaasa nakkutigineqarnerisigut. Aamma Atassutip tikkuarpaaa, ukiuni sisamani ingerlanneqarsinnaasup "Team Greenland forløb"-ip eqqunneqarsinnaaneranut periarfissaq.

**Kattusseqatigiit Partiat**

Kattusseqatigiit Partiat isumaqarpoq, ilinniartunut atugassaritineqartut pitsaanerusumik qulakkeerneqarnissaat aammalu ilinniarnertuunngorniarlutik ilinniartut pitsaanerusumik piareersarneqartarnissaat.

Inatsisissatut siunnersuut pillugu apeqqutit assigiinngitsut siullermeerlugu suliarineqarnerani Kultureqarnermut, Ilinniartitaanermut, Ilisimatusarnermut, Ilageeqarnermullu Naalakkersuisumut saqqummiunneqarput. Apeqqutinut taakkununga akissutini pillugit Naalakkersuisoq ulloq 30. september 2011-mi allagaqarluni ataatsimiititaliamut ilisimatitsivoq.

(**ilanngussaq 1-tut** ilanngunneqarpoq).

**Tusarniaanermut akissutit**

Siunnersuut piffissami 25. maajimiit 29. juunimut 2011-mi suliamut attuumassuteqartunut tusarniutigineqarpoq. Tusarniaaneq piffissami atuarfinni sulisut soraarummeernernik aasaanerani lu atuannigiffeqarnissamut ulapputeqarnerisa nalaani ingerlanneqarsimasoq ataatsimiititaliamit maluginiarneqarpoq. Tamannali tusarniaanepup pitsaassusianut annertuumik sunniuteqarsimasutut ataatsimiititaliamit isigineqanngilaq.

Tusarniaanermut akissutit tiguneqartut siunnersuutip annikitsunik allanngortinnissaanut tunngavissaqartitsilersimapput. Tusarniaanermut akissutit inatsisissatut siunnersuummut ilanngunneqarsimapput, tamannalu iluserititassat pillugit Inatsisartut Siulittaasoqarfiannit piomasqaataasunut naapertuuppoq. Tusarniaanermi akissutininut takussutissaq ataatsimoortoq Naalakkersuisoqarfiup oqaaseqaatai ilanngullugit Ilinniartitaanermut Ilisimatusarnermullu Naalakkersuisoqarfimmit suliarineqarsimavoq.

### **Siunnersuutip ataatsimiititaliamit suliarineqarnera**

Inatsisissatut siunnersuutip suliarineqarneranut atatillugu piareersaataasumik sulineq annertoq, suleqatit suliamut attuumassuseqartut suleqatiginerisigut, ingerlanneqarsimasoq ataatsimiititaliamit maluginiarneqarpoq. Naalakkersuisut Aningaasaqarnermut Ataatsimiititaliamut allakkani ulloq 9. oktober 2009-meersuni akissutaat ataatsimiititaliamit maluginiarneqarpoq, taakkunani paasisutissiissutigineqarluni Naalakkersuisut ilinniartitaanermik aaqqissuusseqqinnermik suliaqarneranni ilinniarnertuunngorniarfinni tamani ilinniakkat qaffasissusiannik qaffatsitsinissaq siunertatut pingaernerutinneqartoq. Taamaattumik aamma qulakkeerneqartariaqarpoq ilinniarnertuunngorniarluni ilinniakkat qaffasissusiat ima pitsaassuseqassasoq inatsisip siunertaa eqqortoq atulersinneqarsinnaalluni, tassungalu ilanngullugu qulakkeerneqarluni ilinniarnertuutut soraarummeernerup Kalaallit Nunaanni, Danmarkimi nunanilu allani ilinniaqqinnissamut atorineqarsinnaanissaa. (§ 1 imm. 2).

Ataatsimiititaliaq isumaqarpoq, aaqqiineq ilinniartut semesteri siulleg ataatsimut tunngaviusumik ilinniartinneqarnissaat, kinguneranillu GU-mut "ilisarititsineq"-rup ingerlanneqarnissaa, ilinniartitaanerup aallartinneqarnerani pitsaasuusoq, taamaalillutillu ilinniakkanik imminnut pitsaanerutitaminnik toqqaasinnaalissallutik. Ataatsimiititaliaq isumaqarpoq, taamaaliornikkut ilinniartut ataasiakkaat piginnaasaat qaffassarneqassasut, taamaalillutik namminneq soqutigisatik aallaavigalugit immikkoortunut ilinniarfigerusutaminnut saassinnaallutik aammalu nukissaqarnerullutik.

Peqatigalugulu ilinniartitseriaaseq iliniartunut tunnganerusunngorlugu allanngortinneqarsimavoq, ilinniartitsisut ilinniartut ataasiakkaat naatsorsuutigisaat ilinniakkaminnilu piginnaasaat aallaavigalugit sulisinnaallutik. Tassunga atatillugu Ataatsimiititaliamit pitsaasutut isigineqarpoq, fagini tamani ilinniartitsineq tunngaviusumik allat oqaasiinik atuilluni perorsaanermi imatut

atorneqalersimammat, ilinniartut oqaatsit kalaallisut aamma allamiut oqaasii atorlugit oqariartaatsit ilisimalerlugit.

**Ataatsimiititaliami Ilinniarnertuunngorniarni aqqissuusseqqinnermik suliaqarnermut atatillugu, Ataatsimiititaliaq Nuummi ilinniarnertuunngorniarnimut paasisassarsiorluni pulaarsimavoq,** pulaarnermi aqutsisut sulisullu ilinniarnertuunngorniarnimmi aqqissuusseqqinnermi piviusunngortitsinniarnemi isummatik suliatillu saqqummiullugit. Peqataasut tamarnik malittarisassat nutaat malillugit sulilernissaminnut qilanaarnertik oqaatigaat. ( Ilanngussaq 3-tut ilanngunneqarpoq Nuummi Ilinniarnertuunngorniarnimut paasisarsiorluni pulaarnermi nalunaarsuiaq)

**Inatsisissat siunnersuummut ataatsimiititaliaq imatut oqaaseqaateqarpoq:**

- § 28, imm. 6-imi oqaaseqatigiit aappaat ataatsimiititaliamit ima paasineqarpoq; ilinniarfiup ilinniartorisinnaasai sinnerujussuarlugit qinnuteqartoqarsimappat Naalakkersuisullu killilimmik amerlanerusunik ilinniartunngortitsinnaaneq akuersissutigisimappassuk qinnuteqartut sorliit akuerineqarsinnaanersut rektorip nalilissavaa, tak. § 28. immikkoortoq 6, oqaaseqatigiit siulliit.
- § 29-mi ilinniakkatut sammiviit suut ilinniarnertuunngorniarni ataasiakkaani neqeroortiginarneqarnersut ilinniarnertuunngorniarnimut ukiut tamaasa aalajangerneqartarnissaa, taamaalilluni ilinniakkap ingerlanera piffissaq tamaat ilinniartup kissaatai pisariaqartitaalu tunngavigalugu ingerlasinnaallutik, ataatsimiititaliamit tunngavilersorluagaasut isigineqarpoq. Naalakkersuisut ilinniakkatut sammivinnik pilersitsinissamut sinaakkutissanik maleruagassiornermini ilinniakkat qinnuteqarfigineqarnerpaat eqqarsaatigalugit ilinniartut qinigassatut periarfissaasa nunap immikkoortuini assigiinngippallaalinninnissaat sapinngisamik isiginiassagaat ataatsimiititaliamit erseqqissarneqassaaq.
- Ukiut sisamat ingerlasussamik “Team Greenland forløb”-imik pilersitsiniarneq, ataatsimiititaliamit § 42-imi malittarisassat tunngavigalugit ingerlanneqarsinnaasutut isineqarpoq.
- § 46, imm. 1-imi oqaaseqatigiit “... aalajangerneqartumik oqaluttariarsornermik allattariarsornermillu misilitsinnerit arlaqartut” ataatsimiititaliamit imatut paasineqarput ilinniarnertuutut soraarummeernermi oqaluttariarsornermik aammalu allattariarsornermik misilitsinnerit ataatsikkut aalajangersarneqarnissaannut periarfissaqartoq. Kiisalu misilitsinnerit amerlassusissaasa Naalakkersuisunit aalajangersarneqartarnissaat pissusissamisoortut ataatsimiititaliamit isigineqarpoq, tamatumani naatsorsuutigineqarluni ilinniartitaanerni assigiinngitsuni misilitsinnerit amerlassusissaat

ima aalajangersarneqarsimassasut soraarummeernerit nalunassusiat taasungalu atatillugu misilitsinnerit ilinniartitaanerni ataasiakkaani ukiumit ukiumut sanilliunneqarsinnaallutik.

- Inatsisissatut siunnersuutip siullermeerlugu oqaluserineqarnerani oqaatigineqarpoq timersorneq tunngaviusumik ilinniakkap ingerlanneqarnerani taamaallaat pinngitsoorani peqataaffiussasoq. Timip aalatittarneratigut ilinniartut ilikkarsinnaassusiat annertunerusarneranik naatsorsuutiginnineq eqqarsaatigalugu tunngaviusumik ilinniakkap kingorna timersornerup ilinniartitsinermi aamma pingaartillugu ilanngunneqarnissaa ataatsimiititaliamit kaammattuutigineqarpoq.
- Ilinniarnertuunngorniartarfinni ilinnialernissamut inatsisissatut siunnersuummi piumasaaqaatit pillugit ataatsimiititaliaq maannangaaq oqaaseqaatissaqaanngilaq, isumaqarlunili ilinniarnertuunngorniartarneq pillugu inatsisip nutaap atuutilernerata kingorna kingusinnerpaamik ukioqatigiit siulliit ilinniarnertuunngorlutik soraarummeerneranni piumasaaqaatinik atuinermi ilinniartitsinermit misilittagaat ilinniartussatut akuerisat ilinniarnernerminillu maanaannaq unitsitsisarut amerlassusiannut sanilliullugit naliliiffigineqassasut.

Ataatsimut isigalugu ataatsimiititaliaq isumaqarpoq, ilinniarnertuunngorniartarluni ilinniartut akornganni maanaannaq unitsitsisarneq annertuumik annikillisarneqassasoq. Tassunga atatillugu ilinniartunik siunnersuisarneq aamma ilinnialinnginnermi, ilinniarnertuunngorniartarluni ilinniarnernerup nalaani salliutinneqarluinnartariaqarmat, **ataatsimiititaliarlu isumaqarpoq, pineqartoq naammattunik aningaasaliiffigineqartariaqartoq, taamaalillutik ilinniartunut siunnersortit ilinniarnissartik pisariaqartoq sakkussallu tamatumunnga pisariaqartinneqartut pissarsiariniassamatigut, siunnersuineq makkuninnga ilaqartinneqartarmat, inuusuttut amerlasoorpassuit angerlarsimaffitik qimallugit ilinnialertariaqartarmata.** Tassunga atatillugu Ataatsimiititaliamit pingaartorujussuurtut isigineqarpoq, ilinniartitsisoqatigiit ilanngullugit isumagissagaat, klassini toqqissisimanissaq aammalu ilinniartut atuarfimmi imaluunniit ilinniartut angerlarsimaffiniittut toqqissisimanngitsut kanngusaarneqannginnissaat. **Ataatsimiititaliamit ilanngullugu pingaartutut isigineqarpoq, ilinniartut pisariaqartitsisut ilaqutariinnik attaveqaaataasunut attaveqalernissaannut periarfissaqalernissaq.**

Kingullertullu ataatsimiititaliaq isumaqarpoq, ilinniartitsinermi GU-mi aaqqissuusseqqinnermi atortut naleqqussakkat pingaartinneqartariaqartut.

### **Siunnersuutip aningaasatigut kingunissai**

Siunnersuutip piviusunngortinnerani aningaasatigut kingunissai siunnersuummut nalinginnaasumik nassuiaatini erseqqinnerusumik nassuiaatigineqarsimangillat aammalu inatsisip piviusunngortinneqarnerani aningaasartuutit 2012-imi aningaasanut inatsimmi aningaasaliissutigineqartunit matussuserneqarsinnaassanersut ataatsimiititaliamit takuneqarsinnaanngilaq. 2012-mi aningaasanut inatsisissatut siunnersuummi qupperneq 78-mi ilisimatitsissutigineqarpoq ilinniarnertuunngorniartarnermik aaqqissuusseqqinneq aatsaat piviusunngortinneqarsinnaasoq ilinniartitaanermut tunngassuteqartuni tunngavissat tamatuminnga periarfissiinerat malillugu.

Aningaasaqarnermut Naalakkersuisoqarfiup tusarniaanermut akissutaanut oqaaseqaatini paasissutissiissutigineqarpoq ilinniarnertuunngorniartarneq pillugu inatsisissatut siunnersuutip aningaasalersorneqarnissaa pillugu 2012-imi aningaasanut inatsisissatut siunnersuutip aappassaaneerneqarnissaanut Naalakkersuisut allannguutissatut siunnersuummik saqqummiussissasut. Taamaattumillu konto pingaarnermi 20.11.61-imi sillimmatitut immikkoortinneqartut saniatigut ilinniarnertuunngorniartarnermik aaqqissuusseqqinnerup piviusunngortinnissaanut aningaasat suli qanoq amerlatigisut nassariniarneqarnissaat aammalu aaqqissuusseqqinnerup piviusunngortinneqarnissaata kinguartinneqarnera ilinniartitaanikkut immikkut iliuuseqarnermi anguniakkanut qanoq kinguneqarsinnaanersaq suli nalunarpaq.

Naalakkersuisut ukioq 2012-imut Aningaasanut Inatsisissatut siunnersuummut allannguutissatut siunnersuutaat kiisalu Aningaasaqarnermut Ataatsimiititaliamit apersorneqarnermini Naalakkersuisup akissutai 26. oktober 2011-imeersut ilanngussaq 2-tut isumaliutissiisummut ilanngunneqarput. Tassannga allannguutissatut siunnersuutit ukuullutik.

**Qulaani pineqartoq Aningaasaqarnermut Ataatsimiititaliamut akissut **Ataatsimiititaliamit tusaatissatut figuneqarpoq, tassa Ataatsimiititaliap akissut imatut paasivaa, periarfissaqartoq GU-imi aaqqissuusseqqinnermi “suliaq oqitsoq” isumannaatsumik atorineqarnissaa periarfissaalissasq, ukioq 2012-imut Aningaasanut Inatsisissatut siunnersuummi allannguutissat Inatsisartunit akuersissutigineqassagaluarpata.****

**Ataatsimiititaliap inassuteqaatai**



4. november 2011

UKA2011/46

**Ataatsimiititaliaq isumaqatigiittoq** inatsisissatut siunnersuutip saqqummiunneqartup Inatsisartunit aappassaaneerneqarnerani akuerineqassasoq **inassuteqarpoq.**

Taamatut oqaaseqarluni isumaliutissiissummilu allassimasunut paasinnilluni ataatsimiititaliap siunnersuut aappassaaniigassanngortippaa.

Jane Petersen  
Siulittaasoq

Niels Thomsen  
Sinniisussaq

Hans Aronsen

Ruth Heilmann

Aleqa Hammond